

आकाशवाणी

खबरां -----

1 प्रधानमंत्री नरेंद्र मोदी होर जी-20 शिखर सम्मेलन दे दुए ध्याड़े टिकाऊ विकास ते उर्जा परिवर्तन बारे पैहले इजलास गी संबोधित करडन।

2 प्रधानमंत्री नरेंद्र मोदी होरें ब्राजील च लग्गे दे जी-20 शिखर सम्मेलन च ग्लोबल साउथ मुल्यें दी स्थिति पर बल दिता। उनें मुल्यें गी खुराक, ईंधन ते हैलें दी सप्लाई पर कुल संसारी संघर्षे दे माढ़े असर कन्ने निब्बड़ने गी पैहल देने दी अपील कीती।

3 प्रधानमंत्री होरें शिखर सम्मेलन सवां बक्खरे होड़यें बक्ख-बक्ख लीडरें कन्ने दपक्खी मीटिंगां कीतिआं। बरतानिया दे प्रधानमंत्री कीर स्टारमर होरें भारत कन्ने मुक्त बपार समझौते बारे परतियै गल्लबात शुरू करने दी घोषणा कीती ऐ।

4 महाराष्ट्र ते झारखंड च कल्ल असेंबली चुनाएं दे मतदान लेई सब्बै तैयारियां करी लैती गेदियां न। चऊं राज्यें दी 15 असेंबली सीटें पर बी कल्ल उपचुनांs तैहत वोट पाए जाडन।

5 केंद्री गृह मंत्री अमित शाह होरें आखेआ ऐ जे मुख्यै नै विद्रोह सरबन्धी हिंसा च कमी आहिनयै महत्वै आहली कामयाबी हासल कीती ऐ।

<><><><><><><>

PM-G20 Address

प्रधानमंत्री नरेंद्र मोदी होरें ब्राजील दे रियो डे जनेरियो च जी-20 शिखर सम्मेलन गी संबोधित कीता। प्रधानमंत्री होरें अल्प विकसित ते विकासशील देशें यानि ग्लोबल साउथ दिएं दिक्कतें जरूरतें गी उजागर कीता। उनें वैश्विक संघर्षे दा खाद्य, ईंधन ते रसैनी हैल आपूर्ति पर पौने आहले माड़े असर दा जिक्र करदे होई ग्लोबल साउथ दे देशें दी चुनौतियें गी प्राथमिकता देने दी अपील जी-20 दे मिम्बर मुख्यें अगगे कीती। भुखमरी ते गरीबी दे खलाफ लड़ाई ते सामाजिक समावेश पर आयोजित सत्र गी संबोधित करदे होई श्री मोदी होरें वैश्विक साउथ दे देशें पर पौने आहले माड़े असर बारे बी गल्ल कीती। प्रधानमंत्री मोदी होरें भारत दी जी-20 अध्यक्षता दौरान लैते गेदे आम जनता केंद्रित फैसलें गी अगगे बदाने लेई ब्राजील दी सराहना कीती। उनें भारत दे जी-20 विषय इक धरती इक परौआर इक भविष्य दी टिकाऊ होने दी प्रासांगिकता दी बी पुष्टि कीती। मोदी होरें समावेशी वैश्विक शासन

सुधारें दा आह्वान कीता। एह शिखर सम्मेलन 80 राष्ट्रें दे समर्थन कन्नै गरीबी ते भुखमरी थमां निब्बड़ने लेई वैश्विक गठबंधन दे शुभारम्भ दा साक्षी बनेआ। भारत दी घरेलू उपलब्धियें दा जिक्र करदे होई मोदी होरें आखेआ जे पिछले दहाके च 25 करोड़ शा मते लोकें गी गरीबी थमां बाहर कड़डेआ गेआ। देश च 80 करोड़ नागरिकें गी मुफ्त अन्नदाना उपलब्ध कराया जा'रदा ऐ। 55 करोड़ नागरिकें गी विश्व दी सब्बनैं शा बड़्डी सौआस्थ बीमा योजना दा लाह् दिता गेआ ऐ। मोदी होरें अफ्रीका ते होरनैं क्षेत्रें गी दिती जाने आहली सहायता सने वैश्विक खाद्य सुरक्षा च भारत दे योगदान गी बी उजागर कीता।

<><><><><><><>

PM-Bilateral Meeting

प्रधानमंत्री नरेंद्र मोदी होर ब्राजील दे रियो डी जिनेरियो च लग्गे दे शिखर सम्मेलन सवां बक्खरे होइयै कुल संसारी लीडरें कन्नै मिले ते उंदे कन्नै महत्वै आहली मीटिंगा कीतिआं। प्रधानमंत्री होरें अज्ज सोशल मीडिया पर सिलसिलेवार कीती दिएं पोस्टें च अपनी मीटिंगें दा ब्यौरा दिता। उनें मिस्र दे राष्ट्रपति अब्दल फतेह अलसीसी, दक्खन कोरिया दे राष्ट्रपति यून सुक येओल ते यूरोपी कमीशन दे अध्यक्ष Ursula Von der Leyen हुंदे कन्नै होई दी मुलाकातें दा जिक्र कीता।

यूरोपी यूनियन दे अध्यक्ष हुंदे कन्नै लग्गी दी मीटिंगा मगरा मोदी होरें आखेआ जे भारत यूरोपी यूनियन कन्नै कुल संसारी बेहतरी लेई नेइमें तौर पर कम्म करना जारी रखोग। इंडोनेशिया दे राष्ट्रपति प्रबोबो सुनियांटो हुंदे कन्नै मुलाकात दौरान मोदी होरें बपार, सेहतू दी संभाल ते सुरक्षा दे क्षेत्र च सरबंघें गी इंगा करने पर सोच-विचार कीता। पुर्तगाल दे प्रधानमंत्री लुइस मोंटेनेग्रा हुंदे कन्नै गल्लबात दौरान प्रधानमंत्री मोदी होरें परती-परतियै बरतौने आहली उर्जा, ग्रीन हाईड्रोजन ते रखा दे क्षेत्र च साथ-सहयोग बारै सोच-विचार कीता। प्रधानमंत्री होरें ब्रिटेन दे प्रधानमंत्री कीर स्टारमर, फ्रांस दे राष्ट्रपति इमैनुएल मैक्रो हुंदे कन्नै बी मुलाकात कीती। प्रधानमंत्री होरें भारत कन्नै मुक्त बपार समझौते गी लेइयै परतियै गल्लबात शुरू करने दी घोषणा कीती।

<><><><><><>

UK-India FIA

बरतानिया दे प्रधानमंत्री कीर स्टारमर होरें औंदे बरे दे शुरू च भारत कन्नै मुक्त बपार समझौते दे बारै च गल्लबात परतियै शुरू करने दी घोषणा कीती ऐ। उनें ब्राजील च जी-20 शिखर सम्मेलन दे दौरान

भारतीय प्रधानमंत्री नरेंद्र मोदी हुंदे कन्नै दपक्खी बैठक दे बाद एह घोषणा कीती। उनें आखेआ जे भारत कन्नै इक नमां बपार समझौता इंग्लैंड च कम्म रोजगार दे मौके पैदा करने च मददगार साबत होग ते मुख्य भरै च विकास गी बढ़ावा देने च बी मती महत्वै आहली भूमिका निभाग। उंदे दफ्तरै आसेआ जारी इक बयान च आखेआ गेआ ऐ जे इंग्लैंड भारत कन्नै इक नमीं रणनीतिक सांझ भ्याली दी संभावनाएं गी तुप्पग जिंदे च इक बपार समझौता ते कन्नै गै सुरक्षा, शिक्षा, प्रौद्योगिकी ते जलवायु परिवर्तन जनेए केई क्षेत्रें च सहयोग गी मजबूत करना शामिल ऐ।

<><><><><><><>

PM-Sagarmanthan

प्रधानमंत्री नरेंद्र मोदी होरें आखेआ जे स्वतंत्र, खुल्ले-डुल्ले ते सुरक्षित समुंद्री तंत्र लेई भारत दे नजरिये दी दुनिया भर च तरीफ होआरदी ऐ। मोदी होरें नमीं दिल्ली च सागरमंथन, the ocean's dialouge दे सफल आयोजन लेई बंदरगाह, जहाजरानी ते जलमार्ग मंत्रालय दे प्रयासें दी सराहना करदे होई एह गल्ल आक्खी। उनें आखेआ जे सागरमंथन दी सफलता कन्नै मानवता दे समृद्ध भविष्य लेई आम सहमति बनाने च मदद थोग।

<><><><><><>

Election-Arrangements

महाराष्ट्र ते झारखंड च कल असेंबली चुनाएं तैहत वोट पोआने दे सब्बे इंतजाम करी लैते गेन। महाराष्ट्र दी नांदेड़ लोकसभा सीट पर उपचुनां तैहत वोट पाए जाडन। पंजाब, उत्तर प्रदेश, केरल ते उत्तराखंड चऊं राज्यें च फैली दिएं 165 असेंबली सीटें पर बी कल वोट पाए जाने न। झारखंड असेंबली चुनाएं च कल दुए गेड़ तैहत 12एं जिलें च फैली दिएं 38एं सीटें पर वोट पोआए जांगन। मतदान बड्डलै सत्त बजे शुरू होग ते संझा 5 बजे तोड़ी जारी रौहग। किश संवेदनशील मतदान केंद्रें पर संझा चार बजे तोड़ी गै वोट पोआए जांगन।

<><><><><><>

Maharashtra Election

महाराष्ट्र असेंबली दियें 288एं सीटें लेई वोट पोआए जांगन। हाल च होए दे लोकसभा दे चुनाएं दौरान महाराष्ट्र च मतदान प्रतिशत घट्ट रेआ हा, इत्थै 61.33 फीसदी वोट पाए गे हे। चुनां कमीशन दे मताबक शैहरी इलाकें दे लोकें ते नौजोआनें च मतदान गी लेइयै उदासीनता इक्क बड्डी चैंता दा मसला ऐ। 2024 आहले लोकसभा चुनाएं च मुम्बई च 52.4 फीसदी वोट पाए गे हे। 2019 आहले चुनाएं

च 55.4 फीसदी मतदान दर्ज कीता गेआ हा। महाराष्ट्र दे मुख् चुनां अधिकारी एस. चौकेलिंगम होरें आखेआ जे चुनां कमीशन मुम्बई ते होरनें थाहरें पर मतदान प्रतिशत च बाद्दा कराने लेई यत्न करा रदा ऐ। भारतीय जनता पार्टी 149 शिव सेना 81 ते अजीत पवार हुंदी अगुवाई आहली एनसीपी नै 59 मेदवार खड़े कीते देन। कांग्रेस 101, शिव सेना यू.बी.टी 95 ते एनसीपी शरद पवार 86एं सीटें पर चुनां लड़ा करदी ऐ।

<><><><><><>

All Party Meeting

संसद दे स्याले आहले इजलास कोला पैहले सरकारै इस म्हीने दी 24 तरीक गी सब्बनें पार्टिएं दी इक बैठक सद्दी ऐ। बैठका च सरकार इजलास दौरान लोकसभा ते राज्यसभा दी कार्रवाई रमानदारी ते बवस्था आहले ांग्गै सिर चलाना यकीनी बनाने लेई सब्बनें सियासी पार्टिएं कोला सहयोग मंग्गोग। संसद दा स्याले आहला इजलास इस म्हीने दी 25 तरीक गी शुरू होइयै 20 दिसंबर तोड़ी चलोग।

<><><><><><>

Delhi-AIR Pollution

दिल्ली दी सरकार नै केंद्र अग्वे अपील कीती ऐ जे ओह हवा च प्रदूषण दी समस्या कन्नै निब्बड़ने लेई राश्ट्रीय राजधानी च मसनूई बरखा कराने लेई मंजूरी देयै। दिल्ली दे पर्यावरण मंत्री भूपेंद्र यादव होरें केंद्री पर्यावरण मंत्री भूपेंद्र यादव होरें गी इस बारे चिट्ठी लिखी ऐ ते हवा च प्रदूषण गी लेइयै इक्क इमरजेंसी मीटिंग सद्दे दी गुजारश कीती ऐ। नमीं दिल्ली च पत्रकारें कन्नै गल्लबात करदे होई री राय होरें आखेआ जे माहिरें कन्नै सोच-विचार कीता गेआ ऐ ते दिल्ली एन.सी.आर च हवा दी गुणवत्ता च सुधार करने लेई मसनूई बरखा कराने दी शुरूआत कीती जानी लोड़चदी ऐ। दिल्ली एनसीआर च हवा दी गुणवत्ता बरोबर माड़ी होआ करदी ऐ, हवा गुणवत्ता सरबंधी सूचकांक 476 तोड़ी जाई पुज्जा ऐ।

<><><><><><>

SC-Virtual-Hearing

प्रधान न्यायधीश संजीव खन्ना होरें अज्ज आखेआ ऐ जे सब्बनैं जजें गी एह आखेआ गेआ ऐ जे ओह राश्ट्रीय राजधानी क्षेत्र च बड़े मते प्रदूषण गी दिखदे होई जित्थे मुमकन होई सकै, वर्चुअल ंग्वे कन्नै सुनवाई करने दी इजाजत देन। जियां गै प्रधान न्यायधीश ते न्यामूर्ति संजय कुमार होर अदालत च किट्ठे होए तां सुप्रीम कोर्ट दी बार

एसोसिएशन दे प्रधान कपिल सिब्बल ते होरनें वकीलें दिल्ली एनसीआर च प्रदूषण दा जिक्र कीता ते एहदे कन्नै निब्बड़ने दे उपास करने दी मंग कीती।

<><><><><><><>

Shah-IPSC

केंद्री गृह मंत्री अमित शाह होरें गुजरात दे गांधी नगर च 50में अखिल भारतीय पुलस विज्ञान सम्मेलन दा उद्घाटन कीता। इस कार्यक्रम दा सरिस्ता पुलस अनुसंधान ते विकास ब्यूरो-BPRD ते राश्ट्रीय रक्षा शक्ति युनिवर्सिटी आसेआ सांझे तौरा पर कीता गेदा ऐ। उद्घाटन समारोह च गृह मंत्री होरें आखेआ जे भारत नै पिछले 50एं बरें च केई महत्वपूर्ण बदलाव दिक्खे न जिनें कुल संसारी गतिशीलता गी बी प्रभावित कीता ऐ। उनें आखेआ जे इनें बदलावें पुलस बल दी कार्यप्रणाली ते सरूप च बदलाव गी जरूरी बनाई दिता ऐ। अमित शाह होरें आखेआ जे पिछले इक दहाके च मुख्यै नै संघर्ष प्रभावित ज्यादातर क्षेत्रें दी हिंसा च कमी आहन्ने च महत्वपूर्ण उपलब्धि हासल कीती ऐ। उनें आखेआ जे जम्मू-कश्मीर, पूर्वोत्तर ते नक्सल प्रभावित इलाकें समेत उग्रवाद प्रभावित क्षेत्रें दी हिंसा च 70 प्रतिशत गिरावट आई ऐ।

<><><><><><>

IMD-Weather

भारत दे मौसम सरबन्धी मैहकमे नै अगले दऊं-दऊं दिनें च तमिलनाडू, पुडुचेरी ते केरायकल च भारी बरखा पौने दी पेशनगोई कीती ऐ। असाम, मेघायल च अगले 2 ध्याड़ें च ऐन गड़े पौने दा अनुमान ऐ। केरल, अंडेमान ते निकोवार टापुएं ते लक्ष्यदीप च हल्की थ्वां दरम्यानी बरखा पेई सकदी ऐ। नागालैंड, मणिपुर, मिजोरम ते त्रिपुरा च बी अगले किश दिनें इस्सै चाल्ली दे हालात रौळने दा अनुमान ऐ। दृश्यता घट्ट होने दी वजह करी दिल्ली सवां जाने आहली किश रेल गड्डियें ते हवाई डुआरिएं दे समें च चिर लग्गा ऐ।

<><><><><><>

PMAY-U2.O

घरें, कोठें ते शैहरी विकास सरबन्धी केंद्री मंत्री मनोहर लाल होरें आखेआ ऐ जे प्रधानमंत्री आवास योजना दे दुए गेड़ च हर परिवार दा सिरै पर पक्की छत दा सुखना पूरा होग। नमीं दिल्ली च प्रधानमंत्री शहरी आवास योजना सरबन्धी राश्ट्री कार्जशाला च उनें आखेआ जे इस स्कीम दे असर दे चलदे अर्थ बवस्था ते सरबन्धत होरनें क्षेत्रें च कोई 3 करोड़ दे कोलकाल रोजगार दे मौके पैदा होए न। मनोहर लाल होरें

आखेआ जे योजना दे दुए गेड़ दी असरदार अमलावरी ते जवाबदेह शासन कन्नै इस योजना दा लाह धुर खीरै तोड़ी पुजाना मनासब होई सकोग। उन्नै आखेआ जे कम्मकाजी महिलाएं ते औद्योगिक श्रमिकें गी सस्ते कराएं पर रौहने लेई घर उपलब्ध करोआने लेई पैहली बारी इस योजना च इक बक्खरी बवस्था शुरू कीती गई ऐ। प्रधानमंत्री आवास योजना दे दुए गेड़ लेई 25 कोला मते राज्यें मंत्रालय कन्नै समझौते पर दस्तखत कीते न।



Jal Shakti Campaign

केंद्री जल शक्ति मंत्रालय नै अज्ज विश्व शौचालय दिवस दे मौके पर “हमारा शौचालय दिवस” दे मौके पर “हमारा शौचालय, हमारा सम्मान” नां दे त्रै हफ्ते तगर चलने आहले इक अभियान दी शुरूआत कीती। इस अभियान दा मकसद सा सफाई दे बुनियादी ञांचे च सुधार, स्वच्छता बवहार च लोड़चदे बदलाव आहनने गी बढ़ावा देना ते मुख्य भरै च शौचालयें दी कार्य क्षमता ते रख-रखाव गी बधाइयै समुदायिक गौरव गी मजबूती देना ऐ। अभियान दे दौरान केई चाल्ली दिएं प्रतियोगिताएं दा सरिस्ता कीता जाग ते नागरिकें गी सोशल मीडिया प्लैटफार्म राएं अपनी स्वच्छता सफलता दिएं कहानिएं गी सांझा करने

लेई प्रोत्साहन कीता जाग। इस अभियान दा समापन अगले म्हीने दी
10 तरीक गी होग जिसी मनुक्खी अधिकारें सरबन्धी राश्ट्रीय ध्याड़े दे
रूपै च मनाया जंदा ऐ।

<><><><><><>

IAF-Commanders Conference

भारतीय वायु सेना दे कमांडरें दा दऊं-दऊं बरें परैंत लग्गने आहला
सम्मेलन जेहडा नमीं दिल्ली च चलै करदा ऐ, उसी अज्ज रक्षा मंत्री
राजनाथ सिंह होरें संबोधित कीता। एहदे च इस मौके वायु सेना प्रमुख
एयर चीफ मार्शल अमर प्रीत सिंह बी मजूद हे। सम्मेलन च भारतीय
ब्लाइ फौज दिएं कारवाइएं सरबन्धी तयारिं दी समीक्षा कीती जाग जेदे
च उत्तरी सीमाएं पर सयाले दौरान होने आहले अभियानें पर चेचा
ध्यान दिता जाग। इस सम्मेलन च ब्लाइ फौज दे बड्डे कमांडर वायु
सेना दिएं छमताएं ते तयारिं गी बधाने लेई रणनीतिक ते कार्ज
योजनाएं पर चर्चा करै करदे न। एह सम्मेलन कल सम्पन्न होई
जाग।

<><><><><><>